

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



**FAAVAEINA 1839 O LE SULU SAMOA ME 2023**

email: [sulusamoa@cccs.org.ws](mailto:sulusamoa@cccs.org.ws) - Main Office: Ph. 24414, Ext 30 - website: [www.cccs.org.ws](http://www.cccs.org.ws)

***SUI FILIFILIA LAULAU FONOTELE 2023-2024***



**Susuga Tunumoso S. Iosia FT (Sui Taitaifono), Susuga Esera Auatama Esera FS (Taitaifono) & Susuga Dr. Taipisia Leilua FS (Failautusi Aoao) o le Fono Tele 2023-2024.**

***TAUTAI A'E! UA OUTOU TAU LE TAUA LELEI!***



# FAASINO UPU

1. O LE LAUGA	2
2. I'U MANUIA LE FONO TELE 2023	4
3. AU PENISIONE 2023	5
4. O LE PEROFETA MULIMULI	8
5. NA O AFIGGA E TULEI MAI	11
6. A'OA'O FAAU'U FAIFEAU SAMOA	12
7. O LE SULU I O'U VAE	13
8. O E UA MALILIU	14

## O LE LAUGA

Tusi Faitau: Esoto 33: 12-23.

Matua: f.15 & 16, *“<sup>15</sup>Ona tali atu lea o ia ia te ia, Pe afai ta te lē afio atu ma oe, ‘aua le aveina ae i matou nai le mea nei. <sup>16</sup>Se e lava le mea e iloa ai ua alofagia a’u e oe, o a’u atoa ma lou nuu, na o lea, ina ua e afio atu faatasi ma i matou? Ona vavae’eseina lea o i matou, o a’u ma lou nuu ai nuu uma lava i le fogāeleele.”*

Manatu Autū: E LĒ O KANANA, A O LE ATUA SOIFUA.

O le faamanatuina o le Tutoatasi o le malo Samoa, o taimi ia o le fiafia ma le olioli, o le faafetai i le alofa o le Atua, auā o Ia le pogai ma afuaaga o mea uma. Tatou te to manatu ai i le alofa o le Atua i o tatou tua’ā ua mavae atu, sa latou asaina le vao filifili i faigatā ma faafatiatama’i auā se saolotoga mo si o tatou atunuu, aemaise o le Faavae na latou fausia, ‘E Faavae i le Atua Samoa’. O Ia e toatasi le pogai e manuia ai Samoa ma lona lumana’i. E lē o le malosi o le tupe, e lē o le malosi o le poto, po o le malosi o meatau e pei ona i ai le lalolagi i nei ona po, a o le malosi o le Mana Silisili Ese o le Atua.

O lagona uma na o Mose le taitai o Isaraelu. O le Atua o le taitai malaga i le vao. O le Atua na te tausi

ma vaaia. O le Atua na te puipui ma lavea’i i latou. Ina ua uma ona fa’aali le toasā o le Atua i lona nuu, i lo latou tapua’i i le tupua povi, ona suia lea o lana fuafuaga (plan). Na Ia fetalai ia Mose, Sauni le malaga, o le agelu o le a ta’ita’i ia te outou i le nuu o Kanana, o le nuu o loo tafe ai le suasusu ma le meli. O le a puipui outou mai nuu uma o loo nofoia Kanana a e o le a avea laueleele o Kanana e fai mo Isaraelu. A o a’u, o le a ou lē malaga faatasi ma outou (33:2-3).

A tatou mafaufau loloto i fuafuaga nei a le Atua, na te puipui ma lavea’i Isaraelu mai o latou fili. E ta’ita’i iina i latou e le agelu. E fai le nuu o Kanana mo latou tofi. Na o le pau lava le mea ua ese ai ma le fuafuaga muamua, ona o le a lē auai le Atua i la latou faiga malaga.

O le tali atu lea a Mose i le Atua, lea ua fai ma tatou matua, *Afai ta te lē malaga faatasi, ‘aua le aveina a’e i matou nai le mea nei. A e afai tatou te malaga faatasi, o iina e iloa ai, e ese mai lava i matou ai nuu uma o i le fogāeleele.* Ua avea le i ai o le Atua ia Isaraelu, ua tulaga ese ai lava i latou mai nuu uma lava. A tumau pea Samoa i lona Faavae, o iina e iloa ai e ese lava Samoa mai atunuu uma o le lalolagi.

Ua manino lava le mafuaaga ua lē malaga faatasi ai le Atua ma Lona nuu o Isaraelu. Na te lē fimagalalo e faaumatia lona nuu pe tupu lona toasā, ona o lo latou muimui, tomumu ma tete ia te Ia i le faiga malaga, a e ua auina le agelu na te taitaiina i latou i le nuu folafolaina. Peitai e ese foi manatu o Mose ma lona nuu o Isaraelu, e faapea, Afai e lē auai le Atua i le faigamalaga, e leai se uiga i le avea ai o Kanana e fai mo latou nuu. E leai se uiga o manuia uma latou te maua, auā ua latou iloa, o le Atua o le pogai o manuia, ma e tataua lava ona latou malaga faatasi ma Ia. E lē ona o Kanana e tafe ai le suasusu ma le meli, a e tāua le i ai o le Atua.

Atonu o se tofotofoga lea mo Isaraelu, po o le fea e sili i o latou loto? Pe o le Atua, po o le nuu folafolaina? A e ana faapea o tatou i nei ona po, e tutupu foi o tatou manatu, e faamuamua lava manuia ua folafolaina. O se luitau foi lea mo i tatou i nei ona po, i le tele o faamanuiaga a le Atua o loo sasa’a mai mo i tatou, a e pei e tele ina tatou faamuamua manuia o Kanana, a e faagalalo ona tatou malaga faatasi ma le

---

Atua. E toatele ua pisi i le sailiga o le ‘oa ma le tamaoiga, o sailiga o faailoga maualuluga o le poto salalau a e ua lē toaaga i le lotu. *Mataio 16, “<sup>26</sup>Auā se a le aogā i le tagata pe afai na te maua le lalolagi uma, a e māumāu ai lona ola?”* A aunoa ma le Atua, e maumau atoa le olaga.

Fai mai le tala, na matuā salamō Mose ma le nuu uma, e oo i teuga ma manaoga o latou loto, ua tuu ese uma a ua latou anapogi, faatauana le alofa o le Atua ina ia latou malaga faatasi. O le ala lea na toe suia ai fuafuaga a le Atua. “<sup>17</sup>*Ona fetalai mai lea o le Alii ia Mose, O le mea ua e fai mai ai na, ou te faia lava, auā ua alofagia oe e a’u; ua ou iloa foi oe i lou lava igoa.*” *Eso. 33.*

I taimi o le perofeta o Samuelu ina ua toeaina o ia, na o ane ai Isaraelu ma lo latou manaoga, ina ia fai se tupu mo i latou, ia pei o isi nuu o loo i ai o latou tupu. O se manaoga sa sala ese i le faalogo a le perofeta, auā o le mea moni, o le Atua lava le Tupu o Isaraelu. O le mafuaaga lea e ese mai ai i latou mai nuu uma o le lalolagi, a o lea ua manana’o ia fai so latou tupu. E ui o se manaoga na faigata ona talia e le perofeta o Samuelu, a e sa ia fesili i le Atua i sona finagalo e tusa ai ma le manaoga o le nuu. Peitai o le tali a le Atua ia Samuelu, Ia faia pea le mea o loo mananao ai lona nuu – ina ia a’oa’oina ai i latou i le sesē o lo latou manaoga.

I nei ona po ia i tatou le au Kerisiano, o le au faatuatua o e ua talitonu atoatoa i lo tatou Alii – Ina nei pei i tatou o Isaraelu, ua mananao ia pei o isi nuu o le lalolagi, ua mananao ia fai o latou tupu e taitaiina i latou, a e tuu le Atua o Lē na faia i tatou. Ina nei avea foi le tamaoiga ma le poto uiga ese o le lalolagi, e tosina atu ai i tatou ia fia pei o i latou. Ia ‘aua nei galo, e ese i tatou, ese foi le lalolagi. O i tatou o le au Kerisiano, o lo tatou faavae mautū, o le Papa o lo tatou Olataga, o le Atua lava, o Ian a te taitaiina i tatou uma i lenei olaga. Ia tatou faamaoni i ona luma, ia faia lona finagalo ina ia tatou sao atu i lona malo e faavavau.

Na fetalai Iesu i le fafine Samaria, *Ana e iloa le mea foai fua a le Atua, ma le ua fai atu ia te oe, Au mai ia te au, ou te inu... Auā o le vai ou tea vatu ia te oe, e fai ma punavai e puna i luga i le ola e faavavau, e malie ai lou galala, e te lē toe sau foi e te utu vai.* Ina ua iloa e le fafine Samaria

le mea e ola ma manuia ai, e le’i toe faatali i se isi taimi, a e na ia augani ia Iesu mo le vai i lea lava taimi. A maua loa lou avanoa ia Iesu, talia o Ia, pu’e mau, taofi mau, ‘aua nei toe faamaamulu.

Le Ekalesia pe le EFKS, taofi mau i lo ta talitonuga i le faavae mautū – O Iesu le Ao, ua na o Ia tatou te manuia ai. O le tali foi lea a Iakopo, ina ua ao le po o la fagatua. “Ou te lē tuuina atu lava oe, seia e faamanuia mai ia te au.” O le agaga lea e tataua ona maua e le au Kerisiano uma. Taofi mau ma pipii i le Atua, o le Ao o le Ekalesia, o le Faavae o Samoa, ua na o Ia lava. Aua nei o tatou pei o Farao, na fesili i ai Mose po o afea e aveese ai pe faaumatia ai rane ua lilofia ai Aikupito. Fai mai le tali a Farao, O a taeao. O le tali e fau mai luga o le loto ma’a ma le manatu faapito, e aunoa ma le manatu alofa i le mafatiaga o le nuu. Aiseā o le a tuu atu ai i le taeao, a o lea ua maua le avanoa e lavea’iina ai le nuu? O le manatu lava lea ua faasesēina ai i tatou i nei ona po – faapea e le’i taitai, e tele pea avanoa, e oso pea le la, seia oo taeao. E leai, o manatu na, e le oo i ai so tatou iloa, ua na o le Atua. E gata lava lo tatou iloa i le aso nei, ma mea ua tutupu ai.

O Iesu ma le pagota i luga o le satauro, “*O le asō, ta te faatasi ai ma oe i parataiso.*” O lona uiga o le taimi lava tatou te taliaina ai Iesu i o tatou olaga, ua tatou i ai loa i lona malo. Ia avea lenei tala e uiga ia Mose ma le nuu o le Atua, o se faamanatu foi lea mo i tatou le au faatuatua, o tatou o Kerisiano. O le ā le aogā tatou te maua ai Kanana le nuu o loo tafe ai le suasusu ma le meli, a e tatou te lē o malaga faatasi ma le Atua? A aunoa ma le Atua, e leai se uiga o Kanana le nuu folafolaina, seiloga e auai mai o Ia tatou te malaga faatasi e mautinoa e taunuu manuia mea uma.

Ia avea le faamanatuina o le 61 tausaga o Samoa, o se faamanatu mo i tatou, ia tatou faimalaga faatasi ma le Atua e manuia ai Samoa.

Soifua ona o Iesu. Amene.

**Saunia: Susuga Uta Muaulu FS,**  
**EFKS Fasitoo-uta**  
**Pulega Malua Sisifo**  
**Matagaluega MALUA**

---

# ***I’U MANUIA LE FONO TELE 2023***

---

*“O le faamoemoe ua tuai ona taunuu e faanoanoa ai le loto; a o le mana’o ua taunuu, o le laau o le ola lea.” Faataoto 13:12.*

E tulaga ese foi le Fono Tele o lenei tausaga 2023 i nisi itu. Peita’i e le’i tulaga ese ai le alofa o le Atua, auā e pei o tausaga taitasi talu mai anamua, o lona alofa e tumau e lē liliu e faavavau, lea foi na i’u manuia ai le faamoemoe o lenei tausaga. Ia tumau le viiga o lona suafa paia. O le faato’a toe faia lea o le Fono Tele i le masina o Me (e tusa ma le Faavae) talu mai le tausaga 2019, ona o aafiaga o le Koviti-19. Na usuia foi lenei Fono Tele e lē o nofoia le nofoa o le Sui Taitaifono (talua ona maliu le susuga Iosefa Uilelea FT ia Tesema 2022). O le fono a le Komiti Au Toeaina i le amataga o le vaiaso, na tofia ai e ala i lana palota le susuga Amuia Seuata FT e fai ma Failautusi Komiti Au Toeaina sa tauave e le susuga Leaso Tupa’i FT. Na toe filifilia le susuga Asotasi Time FT i le Taitaifono. O loo tumau pea Laulau a isi komiti. Na tualuga le ulua’i vaiaso i le Faauuga o Faifeau Samoa, aemaise o le sauniga lotu ma faafiafiaga a Tupulaga Talavou na taitaiina e le Matagaluega Manukau.

O le ulua’i galuega a le Fono Tele i le vaiaso lona lua ina ua faamaonia sui usufono, o le sailia lea o se Sui Taitaifono, ma filifilia ai le susuga i le Faifeau o Esera Auatama Esera FS, o le faafeagaiga taulagi a le EFKS Sapapalii o le Matagaluega Faasaleleaga. O le tasi lea pine o le mau i le tulaga ese o le Fono Tele o lenei tausaga, ina ua tula’i mai le Sui Taitaifono o le Fono Tele o se faifeau a e le o se Toeaina. O le tala faasolopito o le Ekalesia, o loo gata mai i le Fono Tele 1990 le filifilia o se faifeau, i le susuga Uilelea Uilelea FS a o galue i le EFKS Lepea Faleata. O se isi o galuega taua na sosoo ai i le ulua’i aso, o le faamaonia lea o Iugafono o le Fono Tele 2022, ma Iugafono o le Toe Iloiloga o le Faavae o le EFKS, na faia i le tausaga talu ai 2022. O nisi vaega iloga o lenei toe iloiloga, e aofia ai le aafiaga o le galuega faafaifeau, pe afai e gasegase le faletua i se gasegase tuga. O lenei foi iloiloga na toe suia ai le vaega o le Faavae sa faia i le 2015, faasino i aiaiga mo le tofiga Failautusi Aoao ma le Teutupe a le Ekalesia - na faatapulaa ai i le na o le 2 nofoaiga ta’i 3 tausaga; lenei ua toe faaleaogaina ina ua soloia ese lea vaega o le faavae.

Na faasolo galuega a le Fono Tele i le talanoaina o Mau mai Matagaluega, ma mau mai Komiti seia aulia le Aso Lulu, ona vavae lea o foe a e alo ane i le sauniga lotu e faamamalu ai le au penisione o lenei tausaga. Na ta’ita’i lea sauniga e le afioga i le Taitaifono o le Fono Tele, susuga Tunumoso Soliola Iosia FT, a o le afioga i le Sui Taitaifono susuga Esera Auatama Esera FS na taitaiina talosaga molia. E to’a sefulu ma le tasi le aufaigaluega ua aulia penisione i lenei tausaga - e toa 2 Toeaina ma Faifeau e to’a 9. Na toe fa’auau tualumaga o le Fono Tele i le faamaonia o galuega a komiti tetele a le Ekalesia na faia i le tausaga faa-fono. O se tasi o Iugafono taua mai le Komiti Tupe, o le siitia lea o le Toomaga mai le \$50,000 - \$80,000. O se laasaga e faafiafiaina ai le nofo a Aulotu mo atina’e fia faatinoaina.

Na folasia le Tala o le Tupe o le tausaga faai’uina 31 Tesema 2022 na faamalamalama e le afioga i le Teutupe, susuga Melepone Isara FS faatasi ma le Lipoti a le Suetusi (Ah Chong) mo lona tausaga, ma pasia ai. Sa faamaonia foi le Tala o Faiga Taulaga o le tausaga 2022: Taulaga Samoa - \$17,782,786, (faasiliga \$1,180,284), a o le tuufaatasiga ma isi taulaga: \$26,845,975 (faasiliga e \$2,117,909). Ua faamaonia foi le uma ai ona totogi o le nogatupe a le Ekalesia sa faia i le SNPF mo le fausia o le Fale Iupeli.

O galuega mulimuli e masani ai le Fono Tele, o le faamavae ma tuua le nofoa e le Taitaifono ia Tunumoso Iosia FT, ina ua suia ma nofoia e le Sui Taitaifono ia Esera A Esera FS. O se Sui Taitaifono tulaga ese i le na o le 5 aso. Ona faia lea o le Palota sa faatautaia e le Pule ma Faiaoga Malua, i le sailiga o se Failautusi Aoao. Na manumalo le susuga Dr. Taipisia Leilua FS, o le faiaoga Malua i lea tofiga. Ua suia ai le susuga Vavatau Taufao FS na tauaveina le tofi talu mai le 2016. Na faia le Palota mo le filifilia o se Sui Taitaifono mo le isi tausaga faa-fono Tele o le a savalia, ma toe filifilia ai le susuga Tunumoso Iosia FT i le palota vavalalata ma le susuga Palemia Tauiiili Reupena FT. O le Taitaifono susuga Esera Esera FS na taitaiina le sauniga faai’u e tapunia ai le Fono Tele 2023, ona lulu lima lea ma feofoofota’i i le agaga fiafia ma faafetai i le Atua, seanoa o Ia e le tau lau o le faamoemoe. Malo le faatofala’i, malo le saili malo mo le Atua ma le Tala Lelei ia Iesu Keriso. ***“O atu ia e faamalolo ma faasa’oloto o’u tagata. (Go forth to heal and free my people.)”***

---

---

# **TAUTAI A'E! TO'A 11 LE AU PENISIONE O LE 2023**

---

## **1. ALOSINA LEATUAOLEVAO VAVAE FT**

Aso Fanau: 14 Me 1953

Nuu: Salailua, Lotofaga (Lotofaga Lepa Aleipata)

Faaipoipo: 13 Mati 1982

Faletua: **OTAOTA SAPATŪ VAVAE.**

Nuu: Solosolo, Lalomauga, Lotofagā (Safata),

Leone (Amerika Samoa).

A'oa'oina: Aoga Tulagalua Salailua, Aoga Faaitumalo

Palauli Sisifo, Kolisi Tuasivi (1968).

1969-1973: Kolisi Leulumoega Fou

1974-1977: Kolisi Faafaifeau Malua.

1978-1980: Kolisi Faafaifeau Pasefika, Fiti.

FA'AAOGAINA:

1981-1982: Ofisa Aoaoga Kerisiano, Tamaligi.

1983-1986: Faamisionare Jamaica & Grand Cayman Islands.

1986-Juni 1992: Faifeau Aulotu i Fiti.

1992-2023: EFKS Papatoetoe, Niu Sila.

NISI GALUEGA NA GALUE AI:

Executive Committee & Council PTC, Suva Fiji.

Executive Committee PCC.

KOMITI EKALESIANA GALUE AI:

1. Komiti Tupe, Sui o le Matagaluega

2. Teutupe Fesoasoani, Matagaluega MANUKAU

3. Komiti Feau Eseese (6 tausaga).

4. Komiti Faa Misionare (10 tausaga).

5. Komiti Au Taumafai

6. Komiti Iloiloga o le Faavae

7. Komiti Au Toeaina.

TOFIGA FAA-MATAGALUEGA:

1. Failautusi Matagaluega

2. Teutupe Fesoasoani.

3. Failautusi Pulega

4. Faifeau Toeaina Pulega manukau Sasa'e.

AULOTU: EFKS PAPATOETOE

PULEGA: MANUKAU I SASA'E.

MATAGALUEGA: MANUKAU.

## **2. ROMA ENOSA FT**

Aso Fanau: 26 Oketopa 1952.

Nuu: Saleimoa, Lepa, Apai Manono.

Faaipoipo: 1988

Faletua: **WILMA ENOSA**

Nuu: Saanapu, Fasitoo-uta.

SOIFUA GALUE I LE EKALESIANA:

Matagaluega A'oa'oga Kerisiano - Ofisa Falealili.

Tesema 1992-2023: Faifeau Tausinuu, EFKS Manunu,

Pulega Anoamaa, APIA SASA'E.

TOFI I LE EKALESIANA:

Komiti Atina'e, Komiti Feau Eseese, Komiti Au Toeaina.

AULOTU: EFKS MANUNU

PULEGA: ANOAMAA.

MATAGALUEGA: APIA SASA'E.

## **3. AUVAA ENELIKO FS**

Aso Fanau: 13 Aokuso 1956.

Nuu: Fagalii, Apia.

Faaipoipo: 7 Ianuari 1995.

Faletua: **ANOFALONU'UULI ENELIKO**

Nuu: Vaipu'a, Salega.

SOIFUA GALUE I LE EKALESIANA:

1992-1995: Kolisi Faafaifeau Malua.

31/3/2001-2023: Osi Feagaiga ma le EFKS

Avondale. 22 tausaga o galue faifeau tausinuu.

TOFI I LE EKALESIANA:

2005-2007: Komiti Tupe a le Matagaluega

2015-2017: Toe filifilia Komiti Tupe Matagaluega

2018-2023: Teutupe a le Pulega.

AULOTU: EFKS AVONDALE

PULEGA: MAUNGAKIEKIE

MATAGALUEGA: AUKILANI.

## **4. DR. ELETISE TAAUTA SULUVALE FS**

Aso Fanau: 21 Me 1952.

Nuu: Moata'a, Aunu'u, Amerika Samoa, Vaie'e Safata.

Faletua: **ROSA SULUVALE**

Nuu: Safune Savaii, Fusi Safata.

---

## **AU PENISIONE 2023**

SOIFUA GALUE I LE EKALEZIA:  
2003-2006: A'oa'o Kolisi Faafaifeau Malua  
2007-2010: Faia'oga Kolisi Faafaifeau Malua  
2010-2023: Faifeau Tausinuu, EFKS Toamua.  
2021-2023: Failautusi Matagaluega Faleata.

TOFI I LE EKALEZIA:  
2011-2017: Komiti Au Taumafai.  
2018-2023: Komiti A'oga.  
2021-2023: Failautusi Komiti A'oga.

AULOTU: EFKS TOAMUA.  
PULEGA: FALEATA SISIFO.  
MATAGALUEGA: FALEATA.

### **5. ESEKIA PENEUETA FS**

Aso Fanau: 29 Setema 1952.  
Nuu: Vaimoso, Vailima, Manono, Falefa.

Faletua: **ASOFIAFIA PENEUETA**  
Nuu: Leulumoega Tuai, Sapapalii, Matautu Falelatai,  
Safaato'a Lefaga.

SOIFUA GALUE I LE EKALEZIA:  
1973-1974 Faiaoga Kolisi Maluafou  
1984 Tiakono EFKS Lotopa  
2002 Toe Faa-tiakono EFKS Sulu o le Ola,  
Manukau sasa'e.

TOFI I LE EKALEZIA:  
2005-2008 Kolisi Faafaifeau Malua  
2009-2023 Faifeau EFKS Lepea, Faleata.  
2011 Faauu i le tofi Faifeau Samoa  
2019 Teutupe Pulega Faleata Sasa'e.

AULOTU: EFKS LEPEA.  
PULEGA: FALEATA SASA'E.  
MATAGALUEGA: FALEATA.

### **6. IAKOPO MANUTAI FS**

Aso Fanau: 11 Mati 1953.  
Nuu: Vaisala, Aopo, Vaipu'a.  
Aso Faaipoipo: 3 Ianuari 1984

Faletua: **PELEIUPU MANUTAI**.  
Nuu: Solosolo, Manono.

SOIFUA GALUE I LE EKALEZIA:  
Tiakono  
Faia'oga Kolisi Tuasivi  
Faia'oga Kolisi Maluafou

TOFI I LE EKALEZIA:  
Komiti A'oga Matagaluega Manukau  
Failautusi Pulega Waikato

AULOTU: EFKS ROTORUA.  
PULEGA: WAIKATO.  
MATAGALUEGA: MANUKAU.

### **7. SAMITU'UTU'U LARRY TOFAEONO WILLIAMS FS**

Aso Fanau: 22 Mati 1953.  
Nuu: Lefaga, Vaiala, Saleimoa, Leloalua-Fagaitua,  
Los Angeles, California.

Aso Faaipoipo: 28 Ianuari 1978.  
Faletua: **SEMURANA ALOFA TOGIA L. WILLIAMS**.

Nuu: Fitiuta Manu'atele, Los Angeles California USA

SOIFUA GALUE I LE EKALEZIA:  
1976-1979: Kolisi Faafaifeau Malua  
1981-1984: Faifeau Tausinuu EFKAS Epenesa Fou,  
San Jose California.  
1984-1993: Faatonu Aoaoga Kerisiano EFKAS  
1993-2023: Faifeau EFKS Sinamoga

AULOTU: EFKA SINAMOGA  
PULEGA: FALEATA SASA'E  
MATAGALUEGA: FALEATA.

### **8. IOANE ALOALI'I FS**

Aso Fanau: 5 Setema 1952  
Nuu: Solosolo.  
Aso Faaipoipo: 3 Setema 1982.

Faletua: **SILAUMUA ALOALI'I**  
Nuu: Uafato Fagalua.

SOIFUA GALUE I LE EKALEZIA:  
Teutupe, Pulega Purisipeni Matu, Kuiniselani.  
Failautusi, Pulega Purisipeni Matu, Kuiniselani.  
Teutupe, Matagaluega Kuiniselani, Ausetalia.

---

## **AU PENISIONE 2023**

TOFI I LE EKALESIA:  
Komiti Tupe,  
Komiti A'oga,  
Komiti Au Leoleo, Matagaluega Kuiniselani.

AULOTU: EFKS MORAYFIELD  
PULEGA: PURISIPENIMATU  
MATAGALUEGA: KUINISELANI.

### **9. MEKI LAUVI FS.**

Aso Fanau: 19 Iulai 1952.  
Nuu: Saanapu, Faleseela, Satupa'itea.  
Aso Faaipoipo: 22 Tesema 1990.

Faletua: **YETMOE MARIA LAUVI**  
Nuu: Faleapuna, Fusi Safata, Vaie'e, Gruangzhou i Saina.

SOIFUA GALUE I LE EKALESIA:  
1995-2023: Faifeau EFKS Masterton.  
2014-2023: Failautusi Pulega Ueligitone Matu  
1997-2000: Komiti Au Leoleo  
2019-2021: Komiti Feau Eseeese.

TOFI I LE EKALESIA:  
Failautusi Autalavou Pulega Ueligitone i Matu.  
Ta'ita'i Autalavou EFKS Ketesemane, Niu Sila.

AULOTU: EFKS MASTERTON  
PULEGA: UELIGITONE I MATU  
MATAGALUEGA: LAUMUAO AOTEAROA.

### **10. NUUAUSALA H. F. COWLEY FS**

Aso Fanau: 23 Me 1953.  
Nuu: Vaigaga, Lano, Paia.  
Aso Faaipoipo: 29 Iulai 1977.

Faletua: **MUTA'AGA COWLEY**  
Nuu: Lotofaga.

SOIFUA GALUE I LE EKALESIA:  
2000-2006: Faifeau Tausi Nuu EFKS Penrith  
2008-2023: Faifeau Tausi Nuu EFKS Riverston

TOFI I LE EKALESIA:  
Komiti Au Leoleo: 2004-2006, 2009-2023.

AULOTU: EFKS RIVERSTON  
PULEGA: SINI SISIFO  
MATAGALUEGA: NIUSAUELESE I SISIFO.

### **11. HARIMALEMAMEA FS**

Aso Fanau: 9 Setema 1953  
Nuu: Gagaifo, Matautu Lefaga, Afega, Faleula.  
Aso Faaipoipo: 4 Setema 1976.

Faletua: **MATURI HARIMALEMAMEA**  
Nuu: Sapunaoa, Sapapalii, Magiagi, Saasaai.

SOIFUA GALUE I LE EKALESIA:  
1973-1976: Kolisi Faafaifeau Malua  
1977: Faifeau Tausi Nuu, EFKS Tapatapaō (a o i ai lenei Aulotu)  
1977: Sui Failautusi Pulega Faleata  
1978: Faau'u Tofi Faifeau Samoa (FS)  
1978-1986: Faifeau Tausi Nuu, EFKS Sataua  
1987-1999: Faifeau Tausi Nuu, EFKS Poutasi  
2000-2004: Matagaluega A'oa'oga Kerisiano (Ofisa Matagaluega Aana)  
2004-2023: Faifeau Tausi Nuu, EFKS Salimu & Musumusu, Fagaloa.

TOFI I LE EKALESIA:  
Failautusi Matagaluega Itu o Tane,  
Failautusi Matagaluega Falealili,  
Komiti Faa Misionare,  
Failautusi Pulega Fagaloa, Apia Sasa'e.  
Faletua ia Matuli Lemamea - Sa Taitaifono Komiti Tupe Mafutaga Aoao Tina mo le 6 tausaga.

AULOTU: SALIMU & MUSUMUSU  
PULEGA: FAGALOA  
MATAGALUEGA: APIA SASA'E.

---

# ***O LE PEROFETA MULIMULI***

***(O le Tala Faasolo faa-Samoaina mai le tusi, 'The Last Oracle' tusia e James Rollins***

A o ia faia lea gaiouga, na pa a'e se fana – mulimuli mai ai ma se tagi o le te'i ma le tiga mai le fasitepu. Na sosoo ane ai ma le salalau solo o pulufana. Peitai o Rosauro sa i le laasaga maualuga atu. Sa le'i iloa e Karai pe fia le umi e tumau ai lena lelei. Pe afai latou te faanatinati o ia i lona tulaga, o le a vave ona mumu ane i ai isi. Ua tatau ona latou faanatinati.

I tala atu o faitoto'a matala, na matuā pogisa le lifi. E lua ni maea u'amea na tautau ai. Sa i ai foi se apefa'i sa i ai i le isi itu.

Sa le'i i ai se taimi mo i latou e fe'a'ei ai. Na pasi atu e Karai ie laulau ia Matesone ma Elisapeta. Na ia faasino atu i ai le ta'aiga i le va o lima. “Na o sina laasaga puupuu lava,” na ia fai atu ai a o faasino i maea u'amea. “Taupe mau ma fa'aaoga seevae e taofiofi ai. 'Aua le pisa tele pe pa'ō pe a taunuu i le pa i lalo. Faatali mai ai mo matou iina.”

Na lue mai le ulu ma le popole o Elisapeta, a o le taavili o mata o Matesone. Peita'i o le sau o pulufana na faavaivaia ai se manatu e teena. Na oso muamua atu Elisapeta. Na ia oso atu i maea uamea i ona lima o saisai i ie laulau. Na sese'e ifo i lalo ma sina 'e'ē ititi.

Ina ua lilo atu o ia i le pogisa o le lifi, na oso atu ai ma Matesone, a o faamau lona tootoo i lona fusipa'u, pei se pelu i lona faamoega. O ia o se tagata umi ma uumi ona lima, sa faigofie ona pa'i atu i maea uamea i lana aapa. Ona sosolo ifo lea i lalo.

“Alu!” na valaau atu ai Rosauro. E le'i liliu o ia a e na ia fana vave atu isi pulufana se lua. “Ou te mulimuli vave atu i ou tua.”

“Vaai le faamau o le lifi –”

“Alu, Piese!”

Na iloa e Karai e sili le usitai nai lo le finau ma se fafine. . . aemaise se fafine o i ai se fana. Na ia taataai ona lima i ie, oso atu ma taupe i le maea uamea. Na

ia sosolo ifo i lalo ma se valaau leo tele ane ia Rosauro. A e le'i uma lana valaau, na iloa atu Rosauro i le tumutumu i luga, i le malamalama. Na ia suigi ane i le apefa'i, lia'i le faamau i totonu, ma tapuni faitoto'a o le lifi. Na folo e le pogisa ia Karai a o ia faase'e ifo i le maea. Na ia lagona le lue o le laina i le faatasi ane o Rosauro. Na vave ona masani le vaai a Karai i totonu o le pogisa. Sa i ai ni malamalama ititi e iloa i le va o faitoto'a i fogafale taitasi. A o ia pasi mai faitoto'a ma faitau le aofa'i, na ia maitauina le ata o le taavale o le lifi i lalo ifo. E to'a lua nisi o loo faapupu'u ai i se tulimanu.

Na emo mai le filiki o se afi mai lalo. O le afi tutu sikareti a Elisapeta. Na taofi e Karai lana alu ifo, ma tuvae ai i luga o le lifi. O se minute mulimuli ane, na tu ane ai ma Rosauro i ona tafatafa. Na maua e Karai le pu sa i ai mo auauunaga. Na ia to ese lana auupega, vane ma faamātala le avanoa, ma ia tilotilo atu ai. Sa gaogao le pa i lalo ifo, ma lona faitoto'a sa tapunia. Na ia geno atu i le isi vaega ina ia faatali mai ai pea i luga. Na uumau e Karai le pito o le pu avanoa i le isi ona lima, ma suigi ifo ai i lalo ma faapupu'u, o lana auupega ua sauni. Na ia autago solo ma maua le faamau e matala ai faitoto'a. Na faalogoina le fe'ei ma le fememea'i o sau mai le lopi (le vaega o i ai le lifi). O le pa o le pulufana na faate'ia ma feala ai tagata o le fale talimalo, lea ua vevesi ai pei o se faamoega pī.

Ua fetau lelei foi lea. O le vāvāō o tagata e talafeagai tonu ma aogā mo i latou.

Na taunuu Karai i lalo, ona matala lea o faitoto'a o le lifi. Na oso vave i fafo i sina avanoa muamua na maua, ma taavale atu i le itu tauagavale, i le mea o i ai se fai togalaau e gata mai lona sulugatiti sa ia tau'aveina se pama pu'upu'u.

Na faatumulia le potu i tagata ma lo latou vevesi solo. Na tauvalaau solo le pulega i le gagana Initia ma fenanui faa-palagi. I nai sitepu mamao ese, na maitauina atu ai e Karai ni tagata se toalua sa fifilemu lava e leai se gaiōā, na la'ei o la'ua peleue e ui ina vevela. O la'ua lima sa i totonu o taga o peleue. Na iloa lelei atu a la'ua uaealesi faapipii i taliga.

Na la'ua iloa mai foi Karai. Peita'i o lona tu mai faafuase'i na faate'ia ai i la'ua e le'i sauni. E ui ina sa

toatele tagata, a e na iloa e Karai ua tataua ona vave lana fuafuaga. O le faatali teisi mo se taugā fana o le a lamatia ai le soifua o tagata e toatele.

O lana fana ua uma ona se'i ane i luga ma fa'ata atu i le va o lau pama, ma fana loa le ulua'i tamaloa i lona muaulu. Na ia feliu'a'i ma taavili i lona vaematua, a o ia toe oomi le amoti o lana fana ma faasalalau atu pulu, sa le'i sagatonu lelei le faasinoga e pei o le muamua. O le pulu muamua na taia ai le tau'au o le isi tamaloa, na tafiti ai i tua. O le pulu lona lua na sesē ese na misi ma tanumia i le puipui o le fale. Na fana mai o ia e le tamaloa mai totonu o le taga o lona peleue, peitai na 'alo faō Karai i lalo a o salalau solo palasa o le puipui i ona tua. A o taoto i lona tau'au, ma ona lima faalolua, na ia toe fana atu i nai inisi mai le fola. Na patatū tonu i le tulivae o le tamaloa, ma sa ia taavili ma pa'ū ifo ona foliga i luma ma taia i le fola malō lona auvae, na lagona le nuti o ponaivi. Sa le'i toe minoi.

Na liliu atu Karai i le lifi ma sa fetau lava lona vaai atu ma le matala mai o faitoto'a o le pa.

O i latou uma sa i ai i le lopi na faate'ia ma tau fai 'u'u le mānava, ona taape solo lea i soo se itu ma le fe'ei ma feoi.

Na tatui e Karai le faamau. E leai se tali mai. Na ia tepa a'e i luga i le faailoilo. Ua valaau mai le lifi. Ua alu i luga. I le mea o i ai le au fanafana i le fale talimalo i le taualuga.

A o faapupu Elisapeta i luga o le lifi, na ia lagona atu le minoi o ona maea u'amea ma puli. Na amata ona alu a'e i luga le taavale i se oso faafuase'i.

“Mieta...” na palauvale ai Rosauero i ona autafa.

Na pulato'a a'e Elisapeta i luga i le ogau'amea pogisa. “O le a la tatou mea a fai?” na ia fesili ai. Na ia 'u'u pea lana afi sikaleti, ma sina mumū sa i ai. Na ia lagona le leai o se fesoasoani, ma na ia ita i le tete o ona lima.

“O le a e nofo faatali iinei,” na fai atu ai Rosauero a o ia feula ese lana afi. “I le pogisa. Aua e te pisa. Ia e filemu lelei.”

Na nofo le fafine i luga o pito o le pu, ona faapa'ū ifo lea i luga o le lifi.

“Tapuni le faitoto'a,” na ia valaau lemu a'e ai ia i latou. “A e 'aua le lokaina. E le iloa mea e tutupu.”

O a mea e tutupu? Ui i lea, na usita'i pea Elisapeta. Na ia toso mai le 'au o le faitoto'a toetiiti a tapunia i lona tama'ilima. O lana vaai mulimuli ia Rosauero o loo uu sauni lana aupega.

Na feula malie i fafo e Karai lana upuvale a o alu a'e i luga le lifi, ona ia tamo'e lea i fasitepu. Na ia taia

nisi i le auala, ma oso vaelua i luga o se ulugalii sa faapupu'u i luga o sitepu ma uu o la'ua ulu. Na ia a'e ta'i tolu sitepu i le oso, tamo'e ma taututu'u ma le alu o le lifi, na ona tu e siaki po o alu pea le lifi. Pe afai na te taunuu i luga ma oomi le faamau, e mafai ona ia taofia le lifi a e le'i oo atu i luga i le taualuga. Na ia misia i le fogafale lua ona ia atili saosaoa lea. Na feei mai tagata mai luga, e 'o'olo le fa'a'ā ma leo uiga ese. E foliga mai ua toe fo'i i lalo le au osofa'i. Na osotū atu Karai i fafo i le fogafale tolu e siaki le lifi, ma patatū tonu i se puipui – o se puipui tino i tagata.

O Koualasaki sa tu tonu ai i autafa o le lifi ma lona tamatamailima o loo oomi le ki.

“Karai!” na ia fai atu a o milimili lona manava. “Oi sole, o le a le mea ua tupu?”

Na matala mai faitoto'a o le lifi.

Na oso mai i fafo Rosauero, o lana tama'i fana ua oomi i foliga o Koualasaki.

“Ei!” Na ia me'i i tua.

“O oe na valaau maia le lifi?”

“Ia, sa ou fia alu atu i luga i le fale talimalo, e vaai po o le a le vevesi o loo fai mai.”

Sa le'i manino Karai po o le fea le aseta aupito sili a Koualasaki: o lona fai'ai mafiafia po o lona paiē.

“Fafu uma tagata uma!” na valaau atu ai Karai.

Ua uma ona gaiio Rosauero, fesoasoani ia Elisapeta ma Matesone i le ui ifo i le avanoa. Na ta'ita'i i latou e Karai i tua i fasitepu. Mulimuli mai ai i tua Koualasaki.

Na faalatalata atu Rosauero i ona autafa a o latou taufetuli ifo i sitepu. “Na ou faalogo atu o latou fenanui. E lē faa-Peretania. O Amerika.”

Na lue atu le ulu o Karai. O fasioti tagata totogi, e tusa ma foliga o le to'alua sa i le lopi.

A e ui i lea, na ia maitauina le tamaloa i fafo o le Fale Mataaga o Talafaasolopito o Amerika. Ma lana pine o le Vaega o Puipuiga Atamai. Mapoletope. E i ai le tagata na ia iloa o le a latou o mai iinei.

Na latou taunuu atu i le lopi ua leai nisi o i ai. Na tauanau atu e Karai le latou vaega e faasolo atu i le faitoto'a matala – peitai a e latou te le'i oo atu i ai, na tu mai se tagata. Na ia amoina i lona tau'au se tama'i fana M4 gutu lautele. E faaopopo i ai, sa faa-fafa i lona tua se fana umi M24, o loo faapipii ai se fa'ata o se fanafana mamao.

O le tagata fanafana nanā lea sa i le taualuga o le fale tuaoi.

O le gutu o le fana sa faasino sa'o lava i le isu o Matesone.

---

E leai se faamoemoe o le tagata fanafana e toe misi lana pulufana lenei. Ona te'i lea ua gau faafuase'i i tua le ulu o le tamalaoa. Na pa'û gau lua ifo i ona tulivae pei o se mea taalo tautau ua motu ifo mai lona manoa. Ona pa'u faô lea ma le pasasa i lalo o le fola. I lalo o lona muliulu, na lâlâ a'e ai le 'au uamea o se tama'i agaese velovelo. I tala atu o le tino, na tu ai Luka i fafo i tala ane o le vaipuna sivasiva. O le kipisi sa i ai le isi ana agaese sa sauni i lona lima. Na kiki ese e Karai le fana, sa ave'ese e Koualasaki. Na faanatinati a'e Luka ia i la'ua ma lia'i ese le naifi.

“Faafetai,” na fai atu ai Karai.

“Sa ou ulaula i fafo ina ua amata le pa pa o fana,” na fai ane ai le tamalaoa ma faasino atu i le malae taalo. “Na ou su'e atu le itu na pa mai ai i le isi itu o le auala. Ou alu atu i ai. Ou te alu atu i luga a e alu ifo le tagata i lalo, ona ou lafi lea ma mulimuli mai ai ia te ia iinei.”

Na patipatia e Karai le tamalaoa i lona tau'au ma le faafetai. Na ia lavea'iina lo latou ola. Na faasino atu Karai i le faitotoa. “Fafu tagata uma. Ua tataua ona tatou o ese mai lenei aai. Faavave.”

Na latou faanatinati ese atu i luga o le auala.

“O le faanatinati e ono avefa ma faafitauli,” na fai atu ai Koualasaki. Na tu o ia o le tasi luma i lona sulugatiti, o loo natia ai le fana fasioti tagata i lalo o lona peleue. Na autilo solo atu Karai i le auala ma ala autu i le tuaoi. O itu uma sa faatumulia i taavale la'upasese, o taavale la'u uta, o loli pusa sasa'a ma taavale laiti. Na faafuase'i ona tutū tagata uma. Leai se toe gaioi. O se aufaipese o pu fa'a'aili ma leo o musika na oso a'e, faatasi ma pesega ma le alalaga o tagata. O se faafiafiaga mo se sauniga tele o loo faagasolo i luga o le auala. Na fesoasoani le vevesi lea e pupuni le faalavelave i le falealimalo, peitai e le'i atoatoa.

Na faalogoina e Karai le leo o se sailini mamao ese. O leoleo o le aai. Ua o mai ona o tauga fana. Na faalogoina foi le tau valaau a tagata mai totonu o le potu o le lifi. Na aga'i i lalo le vaega mo osofaiga.

Na liliu atu Rosauo ia te ia, “O le a la tatou..?”

Na motusia lana fesili i le mānu a'e i luga o leo o pasika. Na liliu atu Karai. O le itu agavale i nai poloka i tua atu, na o ane ai ni pasika se tolu e fepi'opi'oa'i solo i le va o le vevevsi o tagata. E saosaoa tele, o i ai se faalavelave. Na latou o faamalosi i le va o tagata, taia ma susulu solo. Na latou faanatinati sa'o atu i le fale tali malo. O pasika taitasi na i ai ma se isi tagata faaopoopo o i ai se fana. O isi foi tagata tau.

Na tulei atu e Karai i latou i totonu o le alia, ina ia lilo atu ai. Na ia faliu atu ia Matesone ma se'i ese lona pulou pa'epa'e mai lona ulu. “Ma lou pepeue foi,” na ia faatonu atu ai a o ia tuu ae le pulou i lona lava ulu.

“O le a lou faamoemoe, alii?” na fesili atu Matesone a o ia to ese lona peleue.

“O le tagata fanafana lafilafi na ia tulimata'i oe muamua, lau susuga le Foma'i Matesone. O oe le tagata o loo faamuamua le fia fasiotia.”

“Piesa...,” na lapata'i atu ai Rosauo.

Na moulu atu Karai i totonu o le peleue. “O le a ou alu e ta'ita'i ese pasika,” na ia fai atu ai a o faasino i le auala o faatumulia i tagata. Na faasino le isi ona lima i lalo i le alia va-apiapi. “Ia outou o ma isi i le auala lena. O le a tatou toe feiloai ma potopoto i le olo na tatou vaaia o sau i le aai.”

Na mafaufau Rosauo i le fuafuaga, ona lue lea i ai o lona ulu.

“Ta te o ma oe,” na fai atu ai Koualasaki. Na ia laa ese mai autafa o Elisapeta ma sii a'e i luga lana auupega. “E te manaomia se fesoasoani lagolago.” Na luelue le ulu o Rosauo. “E sili atu lona faatasi ma oe nai lo a'u. O le a tumu o'u lima i le puipuiga o tagata lautele.”

E le'i toe finau Karai. Na te fia fa'aaoga sina maso itiiti ma se pulufana. “Alu!” na ia fai atu ai. “Piesa!”

Na liliu i tua Karai. Na togi atu e Matesone lona tootoo ia te ia. Na sapo e Karai, ma na atoatoa ai ana tapenaga.

“Pau lava le mea, 'auna ne'i leiloa! O le nifo elefane lena e mai le seneturi sefuluvalu!”

Na faanatinati atu Karai i luga o le auala a o mulimuli atu ai Koualasaki. Na tamo'e atu tau sulusulu, faalālā solo lona tootoo, ma tauvalaau i le i'uleo Peretania. “Faamolemole se tasi fesoasoani mai! O loo latou taumafai e fasioti ia te a'u!”

Na ia aga'i atu i le itu o fai ai le sauniga faafiafiaga, ma tamo'e solo i le va o taavale ma tagata.

O la tua ane, na taufai faaola ai pasika ma le leo tele ina ua taunuu i le fale tali malo – ona toe fe'eli mai lea ma le saosaoa. Ua o mai i le mea o valaau atu ai Karai.

Na mulimuli atu Koualasaki. “Ua maua tonu lava i latou i le maunu.”

*(Fa'aaauu Sulu Samoa Iuni 2023)*

---

# NA O AFIGA E TULEI MAI FOFOGA O LE ALII...

## LAFOA'I LE TELE, SAILI NA O LE TASI

*“E tasi le mea ua ou ole atu ai i le Alii, o le mea lava lea ou te saili atu ai;” Sala.27.*

Ina ia manuia lau sailiga malo, e i ai nisi mea e tatau ona e lafoa’i.

(1) *E lē mafai ona e faauō ma tagata uma.* Na alofa Iesu i tagata uma, peitai na fa’aalu le tele o ona taimi ma le toa sefulu ma le to’a lua na Ia a’oa’oina. Ona Ia fa’aalu lea o isi taimi faaopoopo ma Peteru, Iakopo ma Ioane, o lana li’o aupito latalata mai ia te Ia. O le faai’uga o lona soifua, na Ia fetalai ai, *“Ua ou tuu atu le mamalu ia te oe i le lalolagi; ua ou faaumaina le galuega na e tuuina mai ia te a’u, ou te faia.”* Ioa.17.

(2) *E lē mafai ona e faia mea uma.* Talu ai le saosaoa tele o le taaviliga ua i ai le lalolagi, o tagata ua faasolo ina pisi faasolo atoa ina ia faatino le tele o galuega. O le fesuisuia’i mai le tasi feau i le isi tiute i totonu o se taimi faatapulaa, e mafai ona aveesea le 40% o le lelei atoatoa o le auaunaga. O faamaumauga a i latou e atamamai i su’esu’ega ma sailiga faapitoa, ua latou faamauina ai, e tele atu mea lelei e te maua ina ua faamamafa le galuega e fai i le taimi e tasi, nai lo le fesuisuia’i mai le tasi i le isi i se tulaga fia faanatinati. Fai mai Tavita, *“E tasi le mea ua ou ole atu ai i le Alii, o le mea lava lea ou te saili atu ai;”*

3. *E lē mafai ona e faasoloatoa.* Ioe, e tatau ona i ai le paleni i le va o lou soifuuga faa-tumaoti ma lou olaga i le lalolagi lautele. A e o se talatuu le talitonuga e mafai ona e silafia tagata uma, e fai mea uma, e te alu i mea uma, ma e maua mea uma. E te lē tau manaomia le iloa o le 99 pasene o mea uma i le olaga; na o lou faamamafa ma taula’i tonu i le pasene e tasi na te aumaia le fua e sili ona lelei ma maualuga lona tulaga.

Pe afai e faigofie ona faalavelaveina oe ma ta’ita’iina sesē ese lou mafaufau, e te manaomia nisi tou te fai paaga, i latou ua i ai le malosi ma le agavaa, latou te fai ma siaki mai oe, e fesoasoani ia te oe ina ia vave ona toe sagatonu lau savali. E tatau ona e manino i mea talafeagai e ao ona latou faafelavei a o e alo i ou faiva, ma mea e leai se taua ia ‘aua ne’i manatu mamafa i ai. O le aotelega o lenei mataupu e mafai

ona faapuupuu faapea: Ina ia mafai ona e ausia mea tetele ma le maualuluga o le olaga, e tatau ona e sauni e tuu ese le tele o nisi mea. E oo lava i mea e lelei.

Fai mai le tusitala i le au Eperu 12, *“O lenei, o i tatou foi, o loo ua vagavagaia e le faapotopotoga o e matamata mai e faapea ona toatele, ina tatou tuu ese ia o mea mamafa uma, atoa ma le agasala e faalavelavegofie ai i tatou, ia tatou taufetuli ma le onosai i le ala tanu o i o tatou luma, <sup>2</sup>ma ia vaavaai atu ia Iesu, o lē na te taitaiina ma le na te fa’aatoatoaina le faatuatua;”*

## AUA E TE FAATALI; FAAMALIE LOU LOTO I LE TAIMI NEI

Fai mai le Poto o Solomona, *“<sup>22</sup>ua leai se mea e sili ona lelei i le tagata, na ona ia olioli o ia i ana lava galuega; auā o lona tofi lea;”* Failauga.3.

O le mafuaaga lena o lo tatou i ai iinei! E leai se tagata na te toe faafoi maia i tatou mai le oti e fiafia i le olaga nei. E tatau ona amata mafaufau i mea e mafai ona fai e maua ai le fiafia i soo se taumafaiga. Na o le pau lenei o le taimi ma le avanoa mautinoa, o le mea lea ‘aua le faatali se’i toe itiiti – se’i i’u manuia a’oga a le fanau, se’i uma ona e faaipoipo, se’i mapu ane teisi pe ritaea – ina ia faafiafia ai lou olaga. E lē iloa pe se a le isi laasaga o le a tupu i lou olaga po o le lalolagi o loo e i ai. O lena e te soifua i le taimi nei, e tatau ona matuā talia ma opogi lelei, fa’aaogā atoa i le mea e gata ai.

E leai se isi sa sili ona pisi nai lo Iesu, a e na Ia silafia le auala e soifua ai ma le fiafia. O lana vavega muamua na faia i le ‘aiga fiafia o le faaipoipoga. O ana polokalame sa fufusi, a e na maua pea taimi e fiafia ai ma tamaiti. E anoanoa’i mana’oga na fia faamalie, a e na maua pea taimi e malolo ma tatalo ai. Pe afai e toe faatulaga lou soifua, mata e te a’ea nisi ‘olo ma mauga e sili atu le maualuluga, ma savalia nisi ala pe ausia nisi vasa e sili ona mamao? O ave a oe o se tasi o i latou e lē mafai ona soona alu i se mea aunoa ma fualaau, faguvai, se faamalu po o se parasuti? ‘Aua e te faatali; faafiafia lou olaga i le taimi nei, manū o maua. FS.

---

# ***TO'A I4 A'O A'O FAAU'U ILE TOFI FAIFEAU SAMOA***

---

## 1. ESERA ESERA

Nuu: Sapapalii, Laulii, Luatuanuu  
Tausaga i Malua: 2015 - 2018  
Galuega: Faiaoga Kolisi Faafai feau Malua  
Tausaga na amata ai: 2021. Umi - 2 tausaga.  
Faletua: Pauline Faafetai Esera  
Nuu: Faatoia, Samusu  
Matagaluega: KOLISI FAAFAIFEAU MALUA

## 2. FAASAO MA'A

Nuu: Siufaga Falelalatai, Moataa.  
Tausaga i Malua: 2016 - 2019  
Galuega o galue ai: Faifeau Tausinuu EFKS Canley  
Vale, Sini Ausetalia.  
Tausaga na amata ai: 2020. Umi - 2 tausaga 8  
masina.  
Faletua: Airona Ma'a.  
Nuu: Tufutafoe, Faleapuna.  
Matagaluega: NIUSAUELESE.

## 3. KOROSETA SEMAU TAVITA

Nuu: Saleaula, Leauvaa, Patamea, Fusi Safata.  
Tausaga i Malua: 2012, 2017 - 2018.  
Galuega o galue ai: EFKSTV  
Tausaga na amata ai: 2021. Umi: 2 tausaga.  
Faletua: Maria K. Tavita  
Nuu: Mulifanua, Lano, Asaga.  
Matagaluega: MALUA.

## 4. LEEFU PULE

Nuu: Fasitoouta, Saanapu.  
Tausaga i Malua: 2013-2016  
Galuega: Pule EFKSTV  
Tausaga na amata galue ai: 2020. Umi: 3 tausaga.  
Faletua: Ie Pule  
Nuu: Vaivase-tai, Lepa.  
Matagaluega: VAIMAUGA

## 5. LEUELU SETU.

Nuu: Leusoalii Luatuanuu, Satupaitea.  
tausaga i Malua: 2015-2018  
Galuega: Faia'oga Kolisi Faafai feau Malua  
Tausaga na amata ai: 2021. Umi: 2 tausaga.  
Faletua: Panorama Eseta.  
Nuu: Utualii, Saasaai, Vaimoso.  
Matagaluega: MALUA.

## 6. LUULAU TAULAGI.

Nuu: Gautavai, Iva.  
Tausaga i Malua: 2017 - 2020.  
Galuega: Aoga Ta Piano, Matagaluega A'oa'oga  
Kerisiano.  
Tausaga amata ai: 2021. Umi: 2 tausaga.  
Faletua: Faauiga Taulagi.  
Nuu: Gautavai, Lano, Salelologa.  
Matagaluega: FAASALELEAGA.

## 7. MARTIN KAPENETA TAUMATE.

Nuu: Samata i tai, Savaia Lefaga.  
Tausaga i Malua: 2016-2019  
Galuega: EFKSTV  
Tausaga na amata ai: 2020. Umi: 3 tausaga.  
Faletua: Rosalote Taumate.  
Nuu: Sapapalii, Saipipi  
Matagaluega: FAASALELEAGA.

## 8. MEAFOU AH CHING.

Nuu: Vaitele fou, Siumu, Fagae'e.  
Tausaga i Malua: 2017-2020.  
Galuega o galue ai: Faiaoga Kolisi Maluafou.  
Tausaga na amata ai: 2021: Umi: 3 tausaga.  
Faletua: Sapia'i Auelua Ah Ching.  
Nuu: Lepa, Saleapaga.  
Matagaluega: FALEATA.

## 9. NELI ALO.

Nuu: Saanapu, Malie, Magiagi.  
Tausaga i Malua: 2003-2006.  
Galuega: Tausinuu, EFKS Albany  
Tausaga na amata ai: 2020. Umi: 2&1/2 tausaga.  
Faletua: Ellaparma Alo.  
Nuu: Sapunaoa, Leonē, Falelatai.  
Matagaluega: AUKILANI

## 10. NUUFAIGATĀ MULIPOLA.

Nuu: Siutu, Salailua, Samata, Satupaitea.  
Tausaga i Malua: 2017-2020.  
Galuega o galue ai: Faia'oga Kolisi a le Ekalesia.  
Tausaga na amata ai: 2021. Umi: 2 tausaga.  
Faletua: Laalaai Mulipola.  
Nuu: Solosolo, Samauga, Lefagaoalii, Nofaalii.  
Matagaluega: VAIMAUGA.

---

## O LE SULU I O'U VAE...

### O OE MA AGELU A LE ATUA (i)

#### 11. SINAPATI SONE.

Nuu: Solosolo, Malifa.

Tausaga i Malua: 2017-2020.

Galuega o galue ai: Faia'oga, Kolisi Maluafou.

Tausaga na amata ai: 2021. Umi: 3 tausaga.

Faletua: AOMĀLŪ SONE.

Nuu: Lepa, Matatufu.

Matagaluega: VAIMAUGA.

#### 12. TAVITA JR. PULU

Nuu: Falevao, Saleapaga.

Tausaga i Malua: 2016-2019.

Galuega o galue ai: Matagaluega A'oa'oga Kerisiano

Tausaga na amata ai: 2021. Umi 3 tausaga.

Faletua: Naomi Pulu.

Nuu: Lotofaga, Letogo.

Matagaluega: APIA SASA'E.

#### 13. TIAFAU VAEGA

Nuu: Saaga Siumu, Paia Savaii.

Tausaga i Malua: 2017-2020.

Galuega o galue ai: Matagaluega Aoaoga Kerisiano

Tausaga na amata ai: 2021. Umi 3 tausaga.

Faletua: Lucy Vaega.

Nuu: Safotu Savaii, Matautu Falelatai.

Matagaluega: NIUSAUELESE SISIFO.

#### 14. ULATIFA LEULUA'IALI'I.

Nuu: Moataa

Tausaga i Malua: 2016-2019.

Galuega: Ofisa Tutotonu (2020-2021), sosoo ai ma le Faifeau Tausinuu EFKS Letogo (2022).

Umi talu ona galue: 3 tausaga.

Faletua: Taugatala Leulua'iali'i.

Nuu: Vailu'utai.

Matagaluega: VAIMAUGA.

*“<sup>14</sup>E le o agaga e auauna ea i latou uma, ua aauina e auauna ona o i latou o e a maua le ola?” Epe.1.*

E afio mai le Atua ia te oe i auala eseese. Ina ua afio ane Iesu i ona soo ma vavao le matagi, na latou manatu o Ia o se aitu. Lona uiga, o lou mafaufau e mafai ona ia faaleagaina lou faatuatua. Fai mai le Tusi Paia o agelu, *o agaga e auauna ua auina e tautua i latou e maua le faaolataga.* Ua e vaai i se agelu? E lē o taimi uma e laei sisina ai i latou ma o latou apaau e felelei ai. O nisi taimi e o mai ai i latou i tulaga ma foliga ua tatou masani ai, ma e tele ina tatou lē amanaia ai i latou. Fai mai le tusitala ia Eperu 13, *“<sup>2</sup>Aua le galo le alofa i tagata ese; auā o lea ua talia ai e isi o agelu ma le lē iloa.”* Atonu e te manatu e lē toe tau auina mai e le Atua ni agelu auā ua Ia auina mai Lona Agaga Paia e fesoasoani, e leoleo, ma ta'ita'i i tatou. A e leai.

Ia manatua, na auina e le Atua lana agelu e lavea'i Peteru mai le fale puipui a o faatali lona faasalaga. O le malaga a Paulo i Roma na alu ai i se vaa na toe ina a faaumatia ai lona ola ina ua fetai'a'i ma se afā tele. Peita'i na auina atu e le Atua le agelu e faamautinoa ia te ia lona saogalemu. O lea na folafola atu ai e Paulo i le auvaa: *“<sup>22</sup>O lenei foi, ou te apoapoa'i atu ia te outou ia outou faamalosi; auā e leai so outou ola e māumau, na o le vaa. <sup>23</sup>Auā na tu mai ia te au le agelu a le Atua e ona a'u, ou te auauna i ai, <sup>24</sup>ua faapea mai, Paulo e, aua e te fefe...<sup>25</sup>O lenei, alii e, ia outou faamalosi; auā ou te faatuatua i le Atua, o le a faapea lava pei ona fetalai mai ai ia te a'u.”* Galu.27. E ui ina e te lē mafai ona vaai i agelu, a e ia e faamalosi ma le mautinoa, o loo latou vaai ma iloa atu oe. Latou te lē aveeseina o latou fofoga mai ia te oe! (*“Ia outou, ne'i tou faaleagaina se tasi o i latou nei e faatauvaa; auā ou te fai atu ia te outou, o a latou agelu i le lagi e le aunoa ona latou vaavaai i fofoga o lo'u Tamā o i le lagi.”* Mata.18:10).

**Pese ma Viiga 227: O agelu mai luga,  
E fesoasoani mai,  
O lou malu mafala,  
Le ola e ola ai.**

---

# ***O Ē UA MALILIU***

***MATI KITIONA P. LAUVI MANAVA***

***(21/1/1951 – 25/1/2023 (72+0+5))***

Na soifua mai le afioga ia Mati Kitiona Pelema Lauvi Manava i lona alaalfaga i Saanapu i le Aso Sa, 21 Ianuari 1951, a e na faamanavaina e le Atua ana galuega i lona aiga i Porirua, Ueligitone Niu Sila i le Aso Lulu 25 Ianuari 2023; ua atoa ai le 72 tausaga ma aso e 5 o lona soifua. Ua silia i le 30 tausaga o galulue o se Tiakono ma si ona faletua o Seese Manava i le Ekalesia e pele ia te ia, le EFKS Ketesemane i Porirua Ueligitone i Niu Sila. O se tiakono finau ma tauivi mo le manuia o si ona aiga faapea le galuega a le Atua. E loto maulalo ma alofa, e galue fiafia ma faamaoni i lona valaauina. E to'a ono ona alo faapea foi ma fanau a ana fanau o loo soifua pea ma le tina. O le tiakono e toaga i sauniga, e lima foai ma galue tausaa'fia. Leitioa foi le Fai Salamo ona viia galuega lelei uma, ma ia faapea ane, "*O le viiga ia faia lea ma taulaga i le Atua, ia avatu foi i Lē silisili ese mea na tauto ai.*" Faafetai Mati. Malo galue. Malo tautua, faafetai fai taulaga i le Atua. Amuia lea auauna e maua mai e lona Matai o loo faapea ona fai.

O lona sauniga faaleaiga sa faataunuuna i le aso 9 Fepuari 2023 o le malumalu EFKS Ketesemane. Sa ou taitai le sauniga. O le susuga Meki Lauvi FS (Faafeagaiga EFKS Masterton) na saunia talosaga, a o le susuga Taipisia Lauvi FS (Faafeagaiga EFKS Whanganui) na saunia le Upu faamafanafana. Sa molimau fanau, o fanau a ana fanau, o ona tuafafine, uso, aiga, uo ma aumea mamae sa auai i le sauniga. O le aso 11 Fepuari 2023, na fai ai lona toe sauniga. Sa ou taitai, o le susuga i le A'oa'o Fesoasoani o Iopu Tagatauli AF sa fofogaina le Tusi Paia. O le A'oa'o Fesoasoani ia Tuuvaamalefoe Misi Misipati AF sa saunia talosaga, a o le susuga Faafetai Milo FS (Faafeagaiga EFKS New Plymouth) na saunia le lauga. Sa molimau fai ma sui o le aiga si ona uso, le susuga i le A'oa'o Fesoasoani ia Lauvi Isaako AF, faapea si ona uso o Meki Lauvi FS (Faafeagaiga EFKS Masterton), faapea le tina ia Seese Manava. Sa faai'u lona toe sauniga i lona oliolisaga tumau i Whenua Tapu, Porirua ma faamavae atu ai i le Pese a le Au Kerisiano – Tofa, tofaina oe le Tama pele. Ia manuia lau malaga.

***Saunia: Susuga Kuatemane Ulutui FS,***

***EFKS Ketesemane,***

***LAUMUA O AOTEAROA.***

---

***TUAOIFAATAMASOALII SAKARIA***

***TAUFAO***

***14/3/1943 – 27/10/2021 (78+7+14)***

Na soifua mai Tuaoifaatamasoalii Sakaria Taufao i lona aiga i Vaitoomuli Palauli i le Aso Sa 14 Mati 1943, a e na maliu i lona aiga i Porirua, Ueligitone Niu Sila i le Aso Lulu 27 Oketopa 2021. Ua atoa ai le 78 tausaga, 7 masina ma aso e 14 o lona soifua. Sa faaipoipo ia Alalaga Faasoia Lauvi o Saanapu (ua maliu si ona faletua), e to'a lima o la'ua alo, ua maliu le tama e toatasi. O ia o se A'oa'o Fesoasoani o le Ekalesia. Sa galue o se Tiakono ma avea ai o se A'oa'o Fesoasoani o le EFKS Ketesemane, Porirua i Niu Sila. O se tasi o toe ulutaia sa faavaeina le Aulotu/Ekalesia i Ketesemane.

O le tamā agamalū ma tausaa'fia. O se auauna tauivi ma finau, e loto maulalo ma faamaoni i lona valaauina. E toaga i sauniga faale-Ekalesia a le Pulega ma le Matagaluega. E aao mafola, loto alofa ma fai taulaga lelei mo le Ekalesia. Ia avatu ia le viiga i le Atua ona o lenei auauna tautua lelei.

O lona toe sauniga, sa ou taitai ma sauni le Upu faamanafana. O le faifeau EFKS Masterton, susuga Meki Lauvi FS na molimoli mai lona tino maliu i le malumalu. O le A'oa'o Fesoasoani ia Iopu Tagatauli sa fofogaina Afioga Paia a le Atua, a o le A'oa'o Fesoasoani ia Tuuvaamalefoe Misi Misipati sa saunia talosaga. Sa molimau le fanau, faapea foi le faletua o le A'oa'o ia Lynn Taufao Asuelu o sui o le aiga. Sa ou molimau mo lona soifua faaleagaga. Na faai'u ona toe sauniga i lona oliolisaga tumau i Whenua Tapu i Porirua, ma matou faamavae atu ai i le tamā i le pese a le au Kerisiano. Tofa, tofaina oe le Tamā pele Tuaoifaatamasoalii Sakaria Taufao. Ia manuia lau malaga.

***Saunia: Susuga Kuatemane Ulutui FS,***

***EFKS Ketesemane,***

***LAUMUA O AOTEAROA.***

**TOFELE FAAMOANA VA**  
**16/9/1931 - 2/5/2023 ((91+7+17)**

*“Amuia e ua oti, o e ua oti o i le Ali’i...Amuia e fa’anoanoa; auā e fa’amafanafanaina i latou.”*

O Tofele Faamoana Va o se tamā matua o lenei Ekalesia i Vailele. O le tamā matua ia Tofele Faamoana Va na soifua mai i le Aso Lulu 16 Setema 1931 a e na faamanava e le Atua ana feau i le soifuaga nei i le Aso Lua 2 ME 2023, ina ua 91 tausaga, 7 masina ma aso e 17 lona soifua. O ona toe sauniga sa faia lava i Vailele, o le afioaga ma le ekalesia ua loa ona tautua ma galulue ai, i le Aso Tofi 18/05/2023.

E toatele sa molimau i le tamā, ma na latou ta’ua o se tagata faamoemoeina ma faatuatuaina i lona tulai mai. O lea ua molimau foi sui o aiga, aemaise o fanau. Sa auga ma faataua e Tofele le soifua tautua ma ola auaua mo IESU ma lana EKALLESIA; o le tamā e alofa, e onosai ma loto maulalo, e savali i upu na te a’oa’o. E matagofie galuega na te fai. E tausa’afia, e onosai e alofa i lana fanau, ona uso ma tuafafine, ma a latou fanau, e agai i ai ma faamaopoopo. E loto fesoasoani i so’o se tagata. Sa fai e Tofele Faamoana Va le faata’ita’iga, e LĒ faalogologotiga pe solomuli pe a tele le auauaga manaomia. Na te lē faatigā i se finagalo o se isi tagata, a e taulamua i le faatupu o le filemu ma le nofolelei.

O Tofele Faamoana Va sa tausi faifeau. E fai taulaga ma taulamua i faata’ita’iga lelei. O se tamā sa faamoemoeina foi i le ekalesia i le tele o ana galuega sa fai. Ua sola nei Tofele a e o loo soifua pea nai ona alo e fa’auau pea GALUEGA LELEI e pei ona amatalia ma pulunaunau ai le tamā a o soifua. Tau ia o lenei – Ia fai pea ma viiga sili o le Atua, le ola na ia aumaia, lea ua toe mapu atu i ona aao. Amuia oe Tofele ua e oti i le oti a le Kerisiano faamaoni ma ua e foi i lou Matai. Ia manuia lau malaga. Alofaaga mai ia te i ma’ua nei faapea la tatou Aulotu.

O le faatofa a le Kerisiano, e lē o le iuga lea, e lē o le muta’aga foi, a o sa’afiafia ia o le mautinoa, ta te toe feiloai ma oe, i se aso o i luma. O le itula e 11.00 i le taeao, Aso 18 o Me 2023 sa fai ai ona toe sauniga i Vailele. O le susuga ia Maauga Motu (FS) sa ulufaleina le sā o le tama, ae saunia e Lealiie’e(AF) ia talosaga a e sa faitau Tusi Paia le susuga ia Faoasau Aunese(AF). Sa ou ta’ita’iina le sauniga ma sa ou molimauina le soifua galue o Tofele.

O ona toe sauniga sa faataunuuna lava lea i lona oliolisaga tumau i lona fanua i Vailele, ma sa ou ta’ita’iina foi lea vaega. Ona matou faamavae atu lea ia te ia i le pese masani Pese 268, ‘Talofa, uso e, tofaina oe.’ Tofa Tofele. Tofa loa. Ia manuia lau malaga.

**Saunia: Susuga Siasia Salesulu (FS)**  
**EFKS Vailele. VAIMAUGA.**

**O OE MA AGELU A LE ATUA (ii)**

*“<sup>1</sup>Auā e poloai atu ia i ana agelu ia te oe, e tausi ia te oe i ou ala uma.” Sala.91.*

O a tulaga e ono auina mai ai e le Atua sana agelu ia te oe?

1) *Ina ua faatupu e i latou e te alofa ma faatuatua i ai, se mea e te lē fiafia ai.* Māfaufau i lagona o Akara. I se fuafuaga fai toalua a Sara ma lana tane o Aperaamo, na to ai Akara ma fanau Isamaelu, i lo la’ua manatu e faataunuu ai le poloaiga a le Atua. Mulimuli ane ona to foi lea o Sara ma na fanau Isaako, avea ma faavae o le tuli ese o Akara ma Isamaeli i le vao. O lona lē mana’o e vaai atu i le oti o lana tama, na nofo mamao ese ai Akara mai le tama, ua auēuē ma tagi. Paga le leaga o le mea ua faia e i la’ua na ia alofa i ai! Peita’i na auina atu i ai e le Atua lana agelu ia Akara, ma ta’u atu o lana tama e i ai lona taunuuga, e tupuga mai ai le nuu tele (Kene 21:18).

2) *Ina ua e fetiaia’i ma lou masiasi, e lē mafai ona efo’ia.* Na mana’o Maria e faaiipoipo muamua ona ia fanaua lea o se tama. Peita’i e ese fuafuaga a le Atua mo ia. E lē gata ina sa ia lagona le masiasi i luma o tagata, a e o le tulafono foi faasino i ia tulaga, e tataua ona fasiotia o ia. Peita’i na auina e le Atua lana agelu ia Maria e ta’u atu o ia o loo ogatotonu o Lana fuafuaga mamana (Luka 1:34-38).


3) *Ina ua tuia lou fatu i le faanoanoa ona o se tasi e pele ua maliu, ma ua lamatia ai lou lumana’i saogalemu.* Sa alofa Maria le Makatala ia Iesu e sili atu nai lo le ola lava ia, ma ina ua Ia maliu ma tanumia, sa ia lagona le matuā nutimomomo o lona fatu. O le taimi lena na auina atu ai e le Atua Lana agelu i fafine e toalua, “<sup>6</sup>E le o iinei o ia; auā ua toe tu mai o ia...” Mata.28.

O le manatu o le lalolagi lē talitonu, o se mea valea ona auina mai e le Atua se agelu e fesoasoani ia te oe i soo se taimi. Peita’i o le upu moni lava, na te mafai ma o le a la faia foi. FS


**TUA'OIFAATAMASOALI'IS. TAUFAO**



**MATI KITIONA P. L. MANAVA**



**TOFELE FAAMOANA VA**



**MALUMALU FOU EFKS TUANA'I**



**A'OAO & FALETUA FAAU'U I LE TOFI FAIFEAU SAMOA (FS)**